

光緒山西通志

孝友錄二

錄四之二

山西通志弟百三十九

賜進士出身頭品頂戴兵部侍郎兼都察院右副都御史巡撫山西提督軍務臣張昫奉
旨監修

歷代

明名
州屬

國朝

太原平
陽二府

張紀遼州人事母侯性謹母卒廬墓宏治間旌門又有蘇希堯希舜父沒兄弟廬墓著孝

陳桂和順舉人藺陽令先是宏治辛酉邑人夢城墮言第六名陳某事繼母至孝榜發果驗

石麟字嘉瑞榆社貢生官翼城教諭事父克孝撫孤姪養叔母人亟稱之初無嗣將納周女爲妾會妻有妊遂令改適連舉子二可珪壺關教諭可璋進士

王鑑字賜之遼州人事親至孝父沒廬墓母亡亦然泣血喪

明嘉靖五年旌門又有王深父沒廬墓嘉靖間旌表

傅明道江西人籍於遼諸生安貧篤孝祖父客死千里負骨歸葬母謝臥病嘗藥祈代比卒哀毀廬墓撫按給銀穀布帛示旌萬厯間命爲儒官弟明倫封股奉母

成大器遼州人家貧克孝方父病篤子喪亟誠家人勿哭恐遺父憂及父愈問之大器婉答如平時

侯于甸遼州諸生性孝友每食思親不置兄弟析產讓肥取瘠有鬻女償債者亟取券焚之庚辰河南饑多就食於遼賑活甚衆以子維泰贈承德郎

李休徵遼州人弟廩生龍徵被賊執去大罵不罵死母楊痛子冒賊亦遇害

蔡翔和順人以吏員謁選聞母衛喪號慟奔歸廬於墓手植

松栢烏巢其上人謂孝感又有趙鯨諸生母卒廬墓稱孝
王壁榆社諸生母疾亟刲股愈之及卒廬墓隆冬生豆一叢
人謂孝感

鹿位事繼母至孝母卒廬墓得危證誓不肯歸病尋愈哭奠
如故又有張道生亦廬繼母墓堅不避寇人稱孝子

孟效先諸生孤貧力學母癰疾口吮其血比卒朝夕謁墓悲
號不輟

田舜耕榆社人家貧精醫力養嫠母以孝稱縣令表其名於
旌善亭

曹法參榆社人幼孤事母甚孝人稱曹孝子兩院歲給粟帛
以示旌

樊大才田一盛俱以刲股愈親疾稱孝

鞏延昌榆社人父良心客死于閩聞訃不食三日遂自縊
常懷仁和順人執鞭爲業每出必計日費養親或遠購芳鮮
封寄及還見父常泣蓋悲其不能躬養也縣令程有本申請
旌表

劉春和醫飯爲生晨起必舉第一碗奉父父年八十餘事之
益謹崇禎間縣令程有本爲請旌表

以上遼州

張尙忠沁州監生幼喪母祖母王育之色養不違比卒哀毀
廬墓以疾亡

張化沁州諸生年六旬事親猶如孺子比沒絕甘旨音樂者
三年

王來麒沁州貢生親死廬墓不束髮者三年有兔蛇繞墓一
禾雙穗之異舊志載與王來鳳俱旌孝子

溫繼宗沁源諸生苦貧盡孝寇至堅守父柩與叔淵等力戰擊傷二賊賊大至中矢死嘉靖間旌表

武彪武鄉人父病嘗糞糞苦喜曰甘則可虞苦卽無憂矣父尋愈後彪卒李崆峒爲撰墓碑

霍樟沁州諸生家貧力養得親歡心萬厯間撫按旌表

崔冠沁源人大學生母病籲天求代父病刲股和藥病俱愈赴京謁選父沒奔喪徒跣數千里踵裂血流官陝西河州判官督糧西甯有政聲

武威彪子也母病籲天求代官扶溝丞心動卽歸而母果病以孝行旌表

史正春沁源人母病劇嘆曰古有王祥臥冰鮮躍若母病可愈堅冰可臥而釋也卽赴沁河解衣臥觀者如堵逾時氣蒸

水釋身幾溺兄力掖之乃出母果愈

趙一鶴父病篤夢人謂曰得鶴肉可愈鶴以其名符潛割股
皆沈問聞語曰與汝紅棍二條烹以進病卽愈奉文旌表

趙廷舉武鄉人負米卽鄆力養二親母病祈藥武當往返四
千餘里母尋愈久之母卒哀毀廬墓專侍父側崇禎間流寇
至父克寬年八十巷戰被執義不屈廷舉號泣求代不得父
斃糾眾復讐手刃賊首自言我趙某來報汝賊圍之隨投井
死海陵許光震爲作孝子傳遠近多賦詩于夢鯉謁選都門
夢父血流盈面心動卽歸中途問難哀毀幾絕終身不仕
胡養心沁源人節婦李氏子天啟甲子負母避水比明視水
痕高與屋齊衆多漂沒養心家獨無恙時謂孝感

李智武鄉人父病篤沐浴默禱南山神祠引刀剖脇摘肝少

許烹以進之立愈

魏瑛武鄉人性孝父病侍藥不離比卒哀毀廬墓哭奠三年
李之沆武鄉人事親孝崇禎壬申流寇至境奔歸扶父入城
避路被執父善醫獨不肯爲賊診視賊怒欲殺之沆請身代
不許伏尸號泣賊併殺之

以上
沁州

蔡荅平定人父卒合葬於母塋開墳見棺號慟欲絕遂廬墓
側地舊多豺狼至是皆斂跡避去

王克已壽陽人母喪廬墓兵亂獨號泣不去賊感其孝不忍
害太祖以文學孝行辟除戶部主事特陞吏部尙書甄拔咸
得人尤以清介著乞歸無餘蓄

李倫孟縣人永樂間由舉人授府軍前衛經歷歲餘聞父思
已卽棄官歸

和承芳舉人令唐山遷趙府審理父卒斬衰竹杖行千里居
喪哀毀制終不起世稱真孝廉

朱鳳平定人幼孤嗣叔父聰後聰無間言及卒叔母董氏重
其貲產逐之鳳旦夕定省不廢以子方封都御史張景華銘
墓

吳宗壽陽人性孝親喪盡禮哀毀廬墓歲旱宗居週十餘里
雨獨霑足成化間旌表其廬賜冠帶年八十餘無疾終

白傑平定人性淳樸弟侃爲陝西副使卒遺一子病廢育之
過已子

閻邦偉壽陽諸生繼母喬氏性最嚴事之性謹嘉靖間負母
避寇入懸窩寇退母出窩遂傾人謂孝感

岳崇壽陽舉人任河間同知事孀母謹母嬰疾湯藥飲食起

居必躬親之不假婢僕

趙蒞郭萬諸生馬孔熙俱廬墓

趙文耀壽陽人性孝父喪廬墓負土築壘三世祖塋制終方歸

張鱗壽陽歲貢痛母早寡中歲失偶不再娶母病目盲鱗憂之髭爲盡白

閻芝壽陽人性孝父感熱疾思食冰時盛暑無所得乃顙天泣求至蔡莊河石麓下有冰湧出持歸進疾遂愈子季才事母克孝飲食湯藥必親之母卒茹素三年足跡不及戶外張鶴字鳴阜孟縣人課子嚴常曰學問之道無他真知實踐存乎其人幼喪父事母盡孝恩賜冠帶

魏恣孟縣廩生父喪哀毀幾死廬墓所負土築墳夙夜號泣

山西通志卷一百三十一 孝友金二
王
遭疾卒

鄭時濟孟縣人年十八母病思肉食家貧不能得封股以進母尋愈

張啟明樂平人父疾不離左右及卒廬墓三年又有諸生趙士廉廬父母墓六年

梁民望樂平人生性孝友親疾嘗湯藥衣不解帶及卒哀毀杜門不出

常守家甚貧繼母老病竭力以養始終不怠

梁民樂平諸生性孝父喪哀毀母疾親侍左右及卒踰躅三年不入妻室

趙恒樂平舉人性孝父卒哀毀母卒痛絕復甦鑿穴墓側朝夕哭奠搢紳爲作二十四感詩

以上平定州

張軾忻州人宣德間舉賢良方正歷綏德知州居喪廬墓又
邢政亦廬墓朱聰潛郝連俱有孝行

張紹光定襄人母趙氏嘉靖時爲寇執去光年十五弟紹冕
方二歲光晝夜哀思潛探音息萬厯間互市罄產贖回時母
年七十一矣父守清年六十八兄弟孝養父母俱逾八十終
曹貞麟忻州廩生父爲流賊所戕負尸還走賊疑其有財迎
刃哭曰甯殺我勿驚父魂羣以爲孝子護送之其孫宗姬父
早喪事祖母傅氏曲盡孝敬數十年如一日人又稱順孫焉
吳一變定襄人少喪母事父至孝守父喪水漿不入口三日
哭絕者再三旣殯穴居墓側二日一食負土築臺哀苦骨立
遠近賢之

韓思齊定襄人孝友樂施父喪廬墓母病禱天求代營先隴

養伯父撫幼弟拾還遺金人咸重之

邢元貞忻州人與弟元亨賣酒爲業誓不分居竭力養親以孝聞又生員梁田居喪邢昂刲股俱以孝稱

桑成名介休人流寓定襄父疾嘗冀憂心及沒寢苦灑血恪遵母訓中丞曹飭買上地五十餘畝給爲桑氏業以旌之並立石縣門外

楊珍靜樂人母疾躬侍湯藥十餘年無怠母卒哀毀骨立羣江靜樂人任耀州判與弟淮居不析爨又呂天召性孝友父病第欲以所蓄八百金遺幼子先示召召曰大人愛子某獨不愛篤乎分毫不取父卒廬墓三年事繼母如所生宋可孝字爾先靜樂人兄嫂死女甫三歲子德政未週歲夫婦育如已出及德政成立以產讓時論高之

呂新鎬忻州人父好施與常曲成之父老疾日夜不離側五年又馬雲以割股稱孝

郝萬幾字慎夫靜樂人母早逝事父曲承意指病侍湯藥及卒殯奠俱合禮里中稱孝

吳忠靜樂人事繼母至孝母老病不能行時值寇變負之去衆多被害母子獨免

趙裕心忻州人崇禎中以孝被旌

以上忻州

孫紹先代州人領鄉試第一舉進士選庶常母卒廬墓三年後以檢討歸卒人爭悼之詩古文雅爲時所推

張定

舊志一舉人累官貴州參政所至有聲知馬湖時剖奢

楊兩宣慰不決之獄先是土官有餽金銀器覆以米麪者悉卻之事母及大母著孝召妻崔死不再娶兄弟八人俸入與

均友愛倍至

王汝敬代州進士官行人亢直不容棄官歸養親卒廬墓所
雨雪凍死

魏登高代州人父客遊患病載之以歸號泣走千里問侍不
懈父尋愈

石會五臺人性孝居喪盡哀前後廬墓六年子崙庠生孝亦
如之又諸生王一中并解委俱以廬墓稱孝

王鵬翼五臺人四世同居帷薄肅然

張三光代州諸生家極貧與妻宮氏竭力事親後旌表

劉寅母病禱神走千里病尋愈父疾斷髮供神愿以身代父
疾亦痊

王斐代州人事親孝典文供甘旨嘗遭水患負親出溺兒女

啼號不顧獲旌表

孫元震代州舉人居母喪瘠毀幾殆父令觀城罷歸貧甚竭力承歡父沒哀痛致疾遂不起

韓鐸繁峙人叔士奇家居爲盜所執奮挺逐之士奇獲免陽

曲周文端爲作義夫傳

按府志云太原王文端作傳

李方實崞縣人事親孝父卒絕葷酒穴居墓左畜二犬有所需繫牌犬頂遺歸家人率如書給之

王貫崞縣人事嫠母張至孝母卒哀毀廬墓又曹子溫賀多壽弓一中王猷俱以廬墓稱孝

郭紹鳳二歲喪母事父登高繼母楊氏無違言父病篤焚香祝天絕粒三日父果痊人咸稱爲郭孝子

王尙質貧甚事嫠母孟曲盡孝養母病日夕號天如嬰兒病

尋愈事兄亦恭謹人稱王孝子

以上代州

張綬保德歲貢母卒廬墓在國學奏准保德河曲糧草永不
起運祀鄉賢又閭忠傳文俱歲貢養親不仕

陳天和與弟天機同居五十載每有勞苦和率先之

高翀年十九刲股愈親疾李孝廉爲之傳

任邦經河曲諸生套寇夜至村外二里許有窖險可避兵令
二子他走自扶老母及妻藏窖中被獲伴曰從營惟所命獨
母年老不能行乞勿驚母與妻並得免邦經從營次日以死
拒賊殺之

劉天爵河曲諸生少孤事母至孝五十載如一日母卒哀毀
成疾時作夢語曰隨母去也遂殞又有苗鳴陽亦以孝聞上

保德州

周遜夏縣人洪武間任分水主簿母喪廬墓三年又諸生秦應槐亦以廬墓稱孝

張斌安邑人永樂間募士北征兄當遣斌曰兄老無嗣請代往後以扈駕功授錦衣衛百戶辭歸養親兄果有子斌子祐孫璉璉皆顯

呂讓字志謙解人永樂間貢生事親以孝稱

張普圓安邑人永樂中以孝被旌

陳孟芝芮城人母卒廬墓寄宿樹下鄉人憐其貧爲置一室朝夕不繼得安之又李捷科亦以廬墓稱孝

呂完安邑人正德間父沒廬墓常有數狼伴之縣令疑其事黎明詣墳驗視果如人言

王旬解州人好學明義性克孝嘉靖乙卯地震被壓甫出卽

問祖宗神主嘗建祠堂歲率子弟修祀事

展繡字廷器解州孝廉昭之子敦厚遜讓父命析居貲產惟弟所取概不問

張英字居傑解州歲貢以孝友稱官兵馬司指揮升淮安府通判有惠政于璠服父喪泣血十日而卒

閻親字本登解州人貢入太學日夜思親遂馳歸終身不復求仕

侯加采字亮余解州人由進士累官四川遵義副使初任順德時聞母病卽解官歸兄病如之居官有廉仁聲

呂鳴韶字宗舜解州人事繼母撫諸弟以孝友著由歲貢任元氏教諭出俸濟貧生人競稱之

李希稷字又田解州人素行端謹事繼母撫孤姪以孝友稱

由歲貢生任大同府教授

譚應春解州人幼孤力耕事母以孝聞又呂論事母趙曙居喪人咸稱之

李鼎新安邑武舉好義樂施事孀母至孝慮違色養終身不會試

景于岡安邑諸生事孀母以孝稱奉旨旌表

劉鑑安邑烈婦李氏孫翰穀得官母病危沐浴請禱割左腋肉作羹進之頓愈逾二紀始卒

景簫安邑人性孝父病危日夜悲號割股作羹進之疾尋愈喬安安邑人侍父伯泰疾躬親湯藥衣不解帶者百餘日父卒哀毀廬墓絕葷酒寢苦塊負土成墳父嗜桃李于墓旁種百株甫三尺而花實母王卒廬墓如前坐中穀生雙岐桃李

秋榮

王鳳安邑人母卒廬墓有白狼伏墓左鳳不懼忽越牆陷竇中以手扶出之狼再四回顧自後時來復歷三年

李瑛安邑人廬父墓三年絕甘旨擇隙種瓜備時祭孟冬猶生人謂孝感

張光射安邑人事親孝晨興必請所食父遊止飲常預授錢酒肆少遠則攜家膳後之昆弟有無與共妯娌化焉事長睦族並有仁讓聲

景嘉會安邑人學優行高事親能孝以弟桂乏嗣病故日夕悲慟竟卒

曹良良曹中丞子汴曰吾族老僕曹甯其子良良垂髫時以搖箕爲生每得毫釐則爲父母具美味稍長傭工其父母不

乏酒肉嗟乎此非孝子乎哉未可忽也爲作良良歌歌曰
甯夫婦病且老有子良良行孝道苦助竭力得毫釐奉養
親常溫飽我雖戟冠爲朝臣睹此美行感懷抱世上豈乏
冠人上天下地能論討妻羅子綺愁不足不爲父母添布
襪嗟爾良良是吾師愿爾多壽多財寶

劉允寬進學諸生事母四十年母嗜瓜豆身任桔槔母病
夜裏請竟得愈子廉民亦諸生遊曹于汴門母喪廬墓著
六言訓正須辨無無齋集行世

楊瑄安邑人少孤貧拾金還主孝事孀母官齊河教諭遷
新安令冰蘖自持卒於官囊橐蕭然士民痛之

王承家進學諸生孝事孀母撫養孤甥以子貴封國子監
正祀鄉賢

李茂春安邑選貢官無極令母沒廬墓三年又王畿莫歲貢
官廣昌教諭吳珉諸生亦胥廬墓

張啟蒙運庠諸生事母孝母壽至九十有九沒未逾月以哀
毀卒

郝本彰安邑人事繼母撫異母弟孝友備至家貧好學每喜
勸人爲善晚別妻子不知所終

宋登雲運庠諸生事母孝母八旬失明日夜號泣得名醫療
之明如舊壽至百歲

解通夏縣人應召言吏部選法不公降河泊所大使到任歸
處家雍睦五世同居又李棠四世同居

曹欽夏縣人弟婦寡而無子病且死欽謂子曰伊有諸女家
貲任分給慎勿與聞諸子尊欽言無敢爭

孫天濟夏縣人母白邁疾弗愈刲股作羹進之遂瘳

楊休夏縣諸生性剛直克孝友廬父母墓凡六年卒於墓側
張孝夏縣諸生母喪廬墓李樹重花尤好掩骼以忠厚稱
卒後里人立石裴介里以表之

衛九錫夏縣人父沒廬墓不御酒肉歲時必哭泣聞者悲之
馮得意夏縣人幼孤事母及祖母皆以孝稱待族隣有恩義
尤精外科活人甚衆有致謝者卻之

劉漢臣夏縣人性孝母病嘗糞居喪不苟鹽菜服卻溫絮人
稱其孝

馮珊夏縣人嘗拾遺遺金幼孤與叔同居析爨時讓多取少
叔卒愛弟尤篤迎養寡姨助甥完娶人多稱之

趙克己夏縣人親疾百日不解帶內外艱六載不御酒肉官

靈臺訓導遷鄜州學正胥有聲

馬彬夏縣人事親極孝父痿痺日侍父側夜則臥牀下父盥櫛時拭污穢不少倦父沒哀毀踰禮衰老拜墓號泣不輟撫弟有恩弟亦以孝聞

張文明夏縣諸生父喪晝夜柩側者二年既病猶哀號不輟事兄謹居鄉亦著仁聲庚辰歲荒出粟辛巳大疫聘醫給藥全活甚衆

楊有成夏縣舉人令完縣以清廉著居家孝友與弟同爨終身詢四姪一子胥成名家產均分

楊自升夏縣人事繼母撫幼弟稱孝友由舉人官滄州牧時隣封多殘破升獨捐貲鼓衆堅守城賴以安宦歸大饑賑粥多全活

郭伉夏縣諸生父母相繼逝葬後猶獨居不入私室者三年人稱其孝

裴應時夏縣人性孝友母疾朝夕侍養躬親湯藥二十餘年其周貧修學賑荒俱有聲

王錫福夏縣人家世清貧適潦水突衝祖塋赴險拾骨葬祭盡禮人服其孝

王璋平陸人父沒京師負柩歸葬事繼母克孝撫幼弟友愛三世同居時論稱之

趙宗岐父太學生仲德早卒事母王以孝聞母卒廬墓三年又李志和陳守職胥廬墓六年

毛汝尹平陸人事養母撫弱弟稱孝友母喪廬墓三年一時欽之

王國泰號雲峰平陸貢生幼孤兄應泰撫育之同爨五十年事兄嫂謹家無私蓄訓姪有義方

崔吉字天祐平陸人有至性居憂六載哀毀骨立里人化之官華州同知祀鄉賢

王濟民字宇元平陸舉人令藥城丁內艱哀毀踰禮至嘔血服除改知河內所在有聲贈族尤篤

李錦芮城歲貢親喪廬墓六年卒于墓所子澤歲貢生孫柄並廬墓柄亦卒墓所

靳茂芮城人年七十夏月負父澡浴疾嘗糞甘苦里婦盜鮓薪見而徐呼曰勿傷汝手缺薪何不告我也

李孝芮城人父疾禱於神廟刲股進之疾遂愈又趙承祚亦以刲股稱孝

郭維藩芮城諸生性至孝事繼母撫幼弟人無間言鰥居五十載壽至九旬

任家聲芮城諸生知府裕統子母病衣不解帶者年餘及亡七日弗食毀瘠不起天啟間同妻並旌孝烈

申我欽夏縣諸生幼孤事母撫弟稱孝友盜夜逼祖寢亟擲衣飾以餌祖遂得脫崇禎十三年以母命給族黨麥全活甚眾賊至與弟我猷効死衛母賊感其孝而去子昌言孫翀胥登賢書

王肇益安邑諸生鳳翔司理家禧子也聞賊索餉代父受刑

凡三日遂死賊憐其父而釋之

以上解州

侯裕福絳州人父懷玉病危號泣絕食祝天求代父病以愈尋被牛舐腸出氣絕隣人納而縫之遂甦時謂孝感事母張

尤謹母卒同弟裕祿哀毀廬墓門傍枯井亦生甘泉

李邦教聞喜人守母王殯十有五月哀毀蔬食常如始喪比葬廬墓獨居十三月服闋親黨迎之始歸又有呂辛陵親喪亦廬墓

李興垣曲人事嫠母張孝侍疾嘗藥夜不就寢比卒哀毀骨立負土成墳廬墓側前有旱橋溝忽湧清泉人名孝子泉成化十七年旌門

裴增稷山人孝事繼母慈育孤姪嘉靖間旌門

陳璽絳州人父恕任貴州參議卒於官扶柩歸葬廬墓終喪事間旌表後以貢任隆慶州州判

張益絳州人父聰客死扶櫬歸每至逆旋依櫬露宿風雨弗移弟增騷人死益憫弟無子爲代其罪竟得免

劉有學字雨河河津人同弟有容並領萬厯庚子鄉薦雅負
文名母病不上春官執喪時淚盡血出事詳袁了凡傳中祀
鄉賢

李國定絳州增生事親孝沒則刻像奉之每飯必祭一如生
存詳見旌孝錄

王宏先絳州人七歲能文十二歲補弟子員淹貫經史母疾
衣不解帶者月餘母卒以哀毀亡

任宗陟絳州人少以舅党冰壑爲師志洛閩學事繼母能孝
家貧資脩脯以活有得悉以供母氏不敢私冰壑雅稱之
衛宜信字爾紳絳州人歲貢生讀書不事口耳雅斲力行事
父母至孝家雖貧甘旨不少缺居喪不飲酒不茹葷三年不
入內室嘗於稷山縣道上建茶亭行旅賴之

李芳聞喜諸生幼孤事母譚惟謹母病禱天求代比卒哀毀廬墓穀麥並多岐穗

甯二翰聞喜貢生事父孝父喪事繼母有加年踰七十定省不少疎

李儒字明晦聞喜人孝友恂謹母景年八十餘憫年已七十矣晨昏問視如兒時由歲貢官訓導遷學正

翟夢杰字興余聞喜人性孝友事父及繼母備極色養事三兄讓產讓財由將材官都司遷薊鎮以終養歸

葉士旺聞喜人好義樂施同居五世

張學孔聞喜諸生母病剪髮斷指愿以身代病果愈

王益聞喜舉人父沒焚券以千金計周濟鄉族毫無吝色事繼母以孝聞

杜文敬河津人性至孝家貧養親備極豐潔母卒哀毀廬墓三年

侯鶴齡河津人幼知孝祖疾侍湯藥終歲不懈母多病因精研醫理多施方藥以乞母壽母卒齋戒三年

張居元稷山人性至孝甫七歲卽代母操薪水或從外歸遇父睡熟跣行跪床下竢覺乃起母姚疾篤嘗冀籲禱以愈由貢生令贊皇乞歸終養父卒哀毀骨立歲時奠享如生

胡澤事親克孝每食必請所欲父違亟疾衣不解帶絕食籲天求代疾尋愈澤少失恃哀毀幾殆父強之始啜粥弟甫週歲且多疾懷抱食飲者六年繼母馬性卞急怒則長跪竟日俟色解方起稷山人胥稱孝友

裴全稷山人父以債負羈獄中時方十餘歲傭工供食代父

山西通志卷一百三十九 孝友第二
受比訊者憐之釋其父

甯學倫稷山人幼孤痛哭幾至失明事母侍疾嘗糞稱孝
甯桂字攀之母喪徒跣三年不食菜果不扇不爐由舉人官
戶部郎以清節著

史三長梁廷吉胥以刲股稱孝

任之奇稷山人家貧盡孝母卒廬墓終身不衣衫服
范應奎絳縣諸生幼孤奉母至孝又拾還遺金云

陳讓絳縣歲貢生善事繼母年饑賑粥掩骼置祭田著易經
說四書一得隨筆久訛一訂諸書

趙進垣曲人七歲喪父事母克盡子職母卒執喪如禮以孝
聞

劉紹宗貢米百里躬侍湯藥以孝友稱舟行值颶風炷香禱

天得無恙

文汝衡垣曲人父三任教職獨侍左右定省惟謹比卒哀毀骨立絕食數日葬值雪泣禱得霽葬已大雪如故

常目垣曲人性孝謹侍父延疾湯藥不懈比卒絕食數日既葬悲泣三年泣官者三食必祭哀慕終身有思親卷

普曰仁垣曲人穎悟有才志存忠孝祖母王喪明侍奉惟謹父暉擢南臺御史護送祖母就養舟抵下邳夜起問安失足溺死寄葬江岸勒石名孝孫冢

文希韓垣曲人幼孤事母陳躬侍湯藥以孝聞痛母苦節力請得旌塾中建祠歲時祀之

文昭垣曲人母朱早寡事之惟謹比沒偕弟昶寢三年後卒鄂有治聲嘉穀數生罄俸與弟中分撫姪如子人共推之

張濟垣曲人家貧克孝每延父客竭力款洽父沒廬墓蔬食水飲一夕夢父拜大成殿卽捐金助修學宮焉

李義垣曲人幼孤事母惟謹母亡朝夕出入詣墳拜告者三年

郭萬里垣曲人事母魯祖母趙定省溫清人無間言

郭元祥事父母及大父母庶母孝兄弟族黨胥稱仁讓

劉盈垣曲人父明嗜讀書嘗牧羊山中持漢書一帙憩樹下讀之一夕暮還遺書於野犬銜歸人傳爲異盈事之克孝蔬果鮮味不進不敢先嘗

程君愛垣曲人家貧力學遊辛全門下事養母以孝聞

趙名允都憲載孫幼孤事母許有老萊子遺風母年八十艱步履特製小輿躬自舁之食必問所欲比卒哀毀幾絕

文登襄之子母卒廬墓三年

魯聖裔垣曲諸生父卒京邸徒步負歸途中早夜焚香奠飯如親存比葬哀毀骨立鄉人重之

鄭元吉垣曲人傭書養母申時觀鬻菜養母時並稱爲孝子文鴻儒垣曲人事父及繼母色養備至母卒哀哭過情父年九十扶持不離跬步異母弟所生四子撫養成立如同已出文朝佐垣曲人幼孤事母盡孝有伯俞風

史宗禹稷山人事母盡孝崇禎間旌門

趙承業聞喜人賊至獨守親喪賊欲剖棺以身護之被殺張綿聞喜諸生張羽義子羽卒事母吳極孝崇禎四年負母避賊洞中賊薰洞執母以身捍之罵不絕口賊並投烈焰中死

來童絳州人家貧傭工于外崇禎間餓莩填壑歸覓父尸不得號泣三日絕食死

孫枝妍絳州諸生闖變索餉挺身代父父得脫賊怒加梃刃閔曰死

韓無斃絳州諸生闖變時避亂稷山夜半賊執其父義不肯逃遂與其弟無期死之

陶冶恭介揆次子官右府都事疏乞終養承顏順志親卒哀毀廬墓庭產瑞芝

以上絳州

蘇四國隰州諸生母病危籲天刲股以進病尋愈

曹鼎蒲縣人成化間父官綏德州倉大使卒貧甚置柩車中妻引于前而自後推之行至黃河糧絕相向哭倏大風吹樹葉滿前視之乃紅棗也遂得餬口扶柩歸里

宋承綬隰州人事親稱孝居喪哀毀茹素力循古禮先後無間桑拱陽兩作復古歌以風世

曹懋通蒲縣人父病躬侍湯藥不解帶者數十日焚香籲天請以身代比卒廬墓三年善事繼母撫異母弟尤爲周至劉餘芳隰州諸生父湛然沒於六安州徒步長號負骨歸葬祭如禮

楊潤隰州人事繼母孝修學賑饑鄉人稱義

張機大甯人邑有荒塚石題明孝子貢士張機之墓旁註廬墓以思親三年不改殺身以全母一死猶生乃萬厯十七年知縣程某語也

曹鴻達字肖亭大甯人父汝相患癰疾侍飲食起居十餘年不懈比病危如醫言嘗糞甘苦以卜存亡母安暮年昏憤巨

夕扶哺如父時母卒已九十七歲矣隆冬號泣鬚眉皆冰廬墓三年櫛沐俱廢時稱東街曹孝子

馬尹昌大甯貢生官香河丞有治聲祀名宦初昌病劇弟尹康祝天求代卒昌感其義田產悉以畀姪世安

劉鳳鳴大甯歲貢曲事繼母卒致底豫族居犯而不校人尤服其雅量

曹定國字世用大甯廩生事父克孝跬步不離學使按郡嘉其誠篤給餼終養

張文炳字斯光大甯人父萬鵬酒後殺人請抵父罪其人復甦時以爲孝感

馬如璧永和人親喪前後廬墓六年

劉光蒲貢生事親竭力父疾籲天求代疾尋愈執喪哀毀絕

輩酒者六載桑拱陽作仁孝詩以贈之

李養榮隰州貢生官王府教授事親至孝前後廬墓六年有

白兔之異子愈秀字誠所諸生死闕難祀鄉賢

以上隰州

郭璿霍州人性篤孝嘗從李白雲曹月川許明正學登永樂
間舉人任南城兵馬指揮父喪徒步歸廬墓側有白兔穴居
馴若家畜月川作歌以表之

劉繩陽趙城人事親孝父沒後哀毀骨立廬墓三年

趙城縣志作純

劉登第趙城諸生居繼母喪廬墓三年兄弟析居田土每取
其瘠者鄉黨稱之

閻順霍州人家貧就業臨汾幼患足疾拘攣不能伸屈兩手
托泥鏝以尻着地而行每值寒食節必備祭物赴州拜掃忽

一日回至洪洞縣拱辰橋遇一人問曰子何往曰之臨汾其
人曰何不行曰足疾不能行其人用針刺其患處卽起行若
無疾者人皆以爲孝感所致咸稱閭孝子

李曉靈石人事親篤孝母病刲左臂肉進之病尋愈又刲右
臂以愈父亦得無恙云

關朝臣靈石人幼能篤孝母病刲左臂肉以愈之父授青州
府倉副使未任而故晝扶柩行夜倚柩泣歸家以禮終葬鄉
人稱之

劉憲靈石諸生朴實有孝行正德六年母壽八十餘負避流
賊賊至憲曰甯殺我勿傷我母遂遇害事聞旌表立石並賜
金助葬祀鄉賢

曹自強事親至孝行已克端丁母憂廬墓三年悲哀如一日

靈石令何錦給扁旌之

王省趙城人幼孤事母孝愛弟撫姪鄉曲推重以子應豫貴贈奉政大夫孫顯圖亦有孝聲

張寶靈石人幼有至性事孀母房氏極盡心力家貧賃米供養自甘粗糲母病藥石弗效割股爲羹以愈之官鳳翔訓導蘭州學正迎養倍至後卒於官旅襯蕭然幾不能歸里

閻思義靈石人二歲喪父事母楊氏孝侍疾不離左右嘗藥割股母卒廬墓三年又劉強母病貧不能供藥餌割股愈親疾以孝聞

王寵靈石貢生邑志稱其吮疽事親不侈孝名聞賊時百折不回祀鄉賢

王之棟武舉之槓弟官都司因救兄死於難

王立賢靈石人天性純謹母趙氏早亡事繼母董氏如生母母病嘗藥父病禱以身代父沒隕絕數次尋築廬墓傍哀痛成疾卒

張諤靈石人與弟詔誥胥以孝友稱親小疾必籲天求代父廷芳左股病癰醫鍼之血潰兄弟吮咂瘡頭愈後親終泣血茹素三年如一日嘉靖間避兵渡河河無舟惟一木函諤讓詔先賊已遁諤遽赴中流遇淺灘得不死人以爲友誼所感邢弼教霍州人元飛翰十世孫父卒於揚奔計水漿不入口者三日扶柩歸跣足徒行晷日中三千里瘞葬廬墓已年餘餘母詣廬勸之歸晝侍母側夜臥廬旁不入私室母病祈天求代夢紫衣人送藥二味病果愈又施棺掩骼煮粥濟貧修河堤贖難婦人稱爲克繼父志補郡學生官光祿寺署丞

周洪陞霍州諸生父煥任山東新城縣丞城陷被執挺身蔽之曰甯殺我乞留父命立地粉身時年二十六妻朱氏年二十餘苦節四十年

以上
霍州

楊清澄雲內人遇歲父卒母邵氏藉縫紉哺兒澄五歲向母索父母泣曰爾父在我安得貧苦至此攜之墓所澄竟日呱呱泣不絕長力養母母病割股爲羹食之旋愈

薩拉齊
廳附

右明諸州屬二百三十四人

又三十二人
附見

國朝

楊方生陽曲人闖變弟爲賊執方生見賊以事自任賊釋其弟囚之凡兩月幾死後得脫弟充槍手當行戍方生求代不得乃隨弟行左右之及歸而兄弟食貧雍睦無間言

潘一桂陽曲人鬻飯事親父性好飲醉必夜歸桂執燭候門

扶之終身不倦父沒廬墓人稱潘孝子

張運通榆次人明御史養子也養在明季以事下獄運通左右奉侍叩闕請以身代繫不許在獄七年闖賊破京師始得出扶以西歸已而賊奔山西家被掠挾之入秦運通隨父行瀕涉危苦至商州得放還父沒哀毀盡禮事母孝養尤篤

崔夢蘭榆次人順德府同知俊士子也闖賊破太原並下諸縣僞榆次令蕭恒執搢紳拷逼輸餉夢蘭代父出應榜掠幾無完膚會賊敗得釋已而賊至榆次僞令出迎城中人遂閉門守賊怒攻城陷之夢蘭全家被獲遂與左應選張養等併俘往關中在道屢瀕於危有僞官憐其孝陰護之得免時官紳不受僞職者賊皆置之商州

大兵定三秦乃與父並得釋歸其母先死賊中藥葬道旁及

父卒復往陝以其喪還合窆焉身歷艱苦居喪又哀毀以贏疾終常作天變錄備述所遭讀者哀之

孟之晉太谷人明武舉性至孝闖賊陷城與母張俱赴井母死賊曳之晉出拷索金不爲少屈痛母死非命每言及輒涕泗交頤訓子以義方兄弟同爨無閒言人皆稱之

韓宗文太谷舉人闖賊據京師脅授僞職堅拒之順治初選沁州學正六年成進士授正定府推官未仕卒宗文天性孝友父年九十餘色養備至兄無子事之甚謹甚爲鄉黨所稱高繹字貫珠祁縣人援例入太學幼孤事母甚謹母沒悲痛幾絕苦塊獨居者三年邑令李旌其門同縣許釗字雪峯康熙壬午舉人事母亦以孝稱

甄子廷興縣人兄懷廷與邑豪趙姓隙順治元年趙率黨數

百人猝至鄉人閉堡門以守趙督衆攻曰第縛甄懷廷孫奔
燭來當卽解去奔燭亦隙於趙也懷廷奮曰柰何以一人而
害數百家請就縛奕燭亦無難色鄉人縛之下趙攢刃刺之
懷廷將下于廷力挽曰兄爲吾父宗子且無嗣不可以死弟
當代兄下懷廷不肯曰死自吾分兩人相爭久之鄉人胥感
泣不得已縛于廷下趙熟視曰非也于廷慟哭言狀趙亦感
動投刃率其衆徑去

張雲鳳字建閣徐溝人八歲失母淚盡繼之以血父爲勸慰
始飲食事父及繼母色養無違父病同臥起二十餘年比卒
苦塊餽粥如禮素冠披髮終三年嚴勸妻孥事母惟謹

蘇曰祥徐溝人生未十歲母呂氏沒哭甚哀日夜聲不絕父
娶繼母事之如母父病衣不解帶二百日後父及繼母沒墓

皆手築旣葬廬墓胥三年邑人將聞諸官力阻之

張繼仲清源人生未晬父商於外年十六誓往尋之道出關東遇猛虎以意默禱虎逡巡去明年果得父歸

任道遠交城農家子也事繼母委曲承順不異所生母亦雅愛之逾於己子縣令米聞之請旌以示勸焉

鄭浩文水人親老家貧力傭以養二十年如一日二親繼沒廬墓哭奠無間朝夕

劉光旭嵐縣歲貢早喪父母邸氏守志撫以成立母嬰病百計醫之罔效乃持刀割股肉進之母獲無恙

李大盛嵐縣人家甚貧祿覈自饜而事父母膳必備父嬰病氣息支綴如屬大盛聞割股事多功亟刲臂肉和羹以匙進甫入口父目倏開食旣頗甘之不數日病寢愈而大盛雅不

語人也

智周萬太谷人諸生昆弟四人家衆三百餘指同室而爨內外無閒言周萬喪妻家政弟成萬妻武氏主之成萬卒武辭於兄公將屏居周萬不可仍悉委之縷絲粒粟無私藏節義萃於一門焉

李志遠太谷人廩貢生早孤事母至孝後官臨縣訓導同縣妻大謨者家貧傭力奉母母病沒每夜歸輒哀慕號泣踰歲猶然楊文德故儒家子也服賈於外聞母病日行三百里以歸侍養厯久不怠康熙中當事皆嘗扁旌其門

郭茂字盛之興縣人事繼母趙得歡心世父象春暮年生子未幾卽卒撫其孤恩踰同懷先不爲繼母所容別居於外及父卒而母所生子有廢疾乃迎繼母與弟同爨服賈致富爲

弟娶生四子而弟沒撫之皆如已出田園歲入必令弟婦知
文券皆藏弟婦所年八十病乃召子姪析其產悉均分之聞
者嗟異

王珽興縣諸生父佐悉武舉明季以冤死珽兄弟皆幼母孫
氏忍死撫之及長遇寇變志不得伸母卒乃與弟瓚上白父
冤痛母之不及見也時相持而泣母性故嚴珽事之惟謹中
年後遺命無析產故昆弟三人白首同居怡怡然有孺子之
慕焉

周昌運榆次人早孤育於祖母及長事之甚篤嘗賈京師一
旦覺心動念祖母遠馳歸則祖母方病聞孫至遂霍然後疾
復發臥牀蓐者至十餘歲昌運與妻侍湯藥飲食益謹及卒
廬墓三年乾隆初以孝旌

寇鳳鳴榆次人家貧父靖喜徵逐酒食鳳鳴常力作奉之每夕必以百錢置枕下終父世無間也知縣劉星表其門

蔣岐鳳字鳴瑞陽曲人乾隆己卯舉於鄉事繼母以孝聞曾璜歲貢生亦善事繼母母有女適同縣張某某外出四十餘年無耗子女無依璜撫之嫁娶皆資焉女得以完節稱又張榮貴亦善事親

賈薇垣名樞以字行陽曲諸生少孤貧事叔甚謹叔年與相若而事之如父授徒以養至老不懈衣食必先叔及諸弟未嘗稍私也叔感疫卒婦繼逝執喪不勝憂悴尋亦卒

張廷彬陽曲人父瑛貿易宣府二十年不歸兄廷材亦繼去久無耗母加氏因憂成疾貧作苦力養既娶婦能事母毅然曰吾今可以尋吾父矣至宣府年餘不得父蹤資盡乞食遇

一農夫叩之乃其兄也始知父賣藥張家口同鄉賈君輔憫其孝助以費使先歸母爲心慰疾頓愈未幾父兄同至一堂孝友無間言少嘗育於外家外祖母關老無依迎養之

劉玘臣太原人質樸有至性父患噎百藥不愈或誑之曰股肉可治玘臣慨然剖肉以進父食之而愈縣令汪嘗表其門張星煜榆次人母侯病劇星煜截一指以血書佛經祈母速愈然侯竟死星煜慟幾絕髮鬚爲白乾隆中旌同縣冀孔增諸生事繼母以孝聞

郭瑛太谷人以吏目注選親老不忍暫離絕意仕進居喪哀毀嘔血數升又舉人孫雲翼及韓國珍並以侍疾居喪著孝聲要錫齡事繼母得歡心

孟廷亮字力臣太谷恩貢父瑒晚歲得痺疾廷亮左右扶持

三年如一日析產以居宅護兄已得棗園一所竹籬茅舍誦讀其中因自號棗園居士所著詩古文詞有家法尤工於書學使蔣元益以國士目之

程師伊字繼川祁縣諸生與弟彥直並以孝著母沒既葬每風雨必偕弟哭諸墓撫幼弟彥士成立侍祖母疾衣不解帶者數年

高爾秀字實夫祁縣人孝事繼母頡氏頡病三年躬侍湯藥衣不解帶及卒哀毀骨立兄早逝無子以已子嗣之提學蔣扁旌其門又任蒧曹善茂並以孝友爲鄉黨所推

薛貴祁縣人生時父客遊遼東久不歸母黨氏茹苦撫育貴甫能言卽向母詰父所在母大異之弱冠欲往尋父以母老家貧不果及母沒書牘於背飲泣東行由燕山抵盛京凡甯

古塔烏拉墨爾根諸處罔不親歷後至鐵嶺入寶山酷暑苦
饑僵臥梵宇山民進以水漿詢所自貴備告之忽寺內一道
人釋杖遽前相抱大哭蓋其父也貴欲歸無貲又經四載始
積儲值買犢牽車輦父以歸時乾隆丙寅歲也邑人戴彭年
傳其事

戴孜瑜字連城祁縣人少孤母病思飲甘水時汲於十里之
外鄉里稱其孝

徐學顏交城人父於乾隆初貿易瀋陽二十餘年無耗學顏
稍壯步出山海關藉醫術資生四越寒暑至吉林極東之北
屯地遇父故友言父死已七年矣指示葬處負骸以歸

陳九卿交城人事寡母至孝母病竭誠侍養所居近文昌祠
每晨起必禱祠並願折算益母壽神示以夢母果愈

陰執競字繩武交城人山居業農而事母甘旨弗缺母中歲失明醫云病以虛受鹿茸可愈貧不能購哭禱於神一日山行忽有巨鹿帶傷垂斃喜極負歸取茸入藥奉母果愈弟是競亦有至性六歲時從兄於田遇虎兄以身障之是競遽前攫虎而立虎引頸去兄疾嘗藥侍寢籲天求代沒後水漿不入於口者數日教養諸姪後皆成立

武紹衣文水監生幼喪母繼母虐遇之父怒欲出母泣諫乃止後母老病臥牀紹衣年逾六十矣煎藥奉膳暨一切瑣事必躬親不令家人代三載如一日鄉族稱之

閻應祥曹天平並文水人以孝友聞

姚思閔徐溝人父早喪力田奉母母疾衣不解帶者兩月弟病疫家人俱避同榻調護無倦邑令旌其門同縣董永昇亦

以善事其親聞於鄉里

劉福財徐溝人耕讀爲業繼母武氏虐使之怡顏悅色奉命維謹及長服賈所獲貲財盡納諸母妻子無所私

董廣和徐溝人父裕山客敦煌二十八年無音問廣和隻身往尋不得資盡乃返越數年復往艱險備嘗卒奉父歸河津訓導馮瑄記其事並贈以詩

羅聖誼及弟太學生純誼俱有孝行人稱羅氏雙壁俱祀清源鄉孝弟祠

王得璽清源人少孤貧無立錫以傭工養母或勸其授室璽曰以力事親猶慮不給若再增食指甘旨得無缺乎後拮据積貲半世克成家室已老且憊矣

邢邦彥清源人乾隆三十二年從父天培征雲南苗匪有功

授外委把總旣而辭職養父三十七年大軍征金川明年木果木失利父戰沒邦彥殉之

秦家驥清源人有至性愛弟家駱尤篤食必同案弟歸偶遲忍饑待之家駱性亦純篤財帛田產互相推讓鄉里以爲難乾隆中旌

牛桂興清源人父以貿易沒於成都桂興年十七往返七千里乞食負骨歸與弟桂旺絕友愛桂旺臨死泣語人曰我死兄必不生若等盍具雙棺待之桂旺死哭之慟未幾亦死又孟立嘗千里尋親安希榮遠求父骸並鄉人

賀聖時興縣人事親以孝稱母沒父繼娶先後所出六人聖時事繼母撫諸弟恩誼備至與弟時同臥起有疾至爲之露禱幼弟聖典尤所愛也與兄聖訓相繼故聖時感傷成疾年

五十卒卒之次年其五弟聖猷舉於鄉泣曰此吾先兄所日夜望者今不及見矣亦以此悲哀成疾云

張聖大字庸爾興縣人少貧作業沿道見聯扁字輒以手記盡就識者問之不終歲字盡識族兄聖維大奇之令就讀遂以諸生貢太學性至孝色養備至親安之而忘其貧父卒哀甚一夜髮鬚盡白年八十卒又王存益亦以侍疾居喪稱孝康若璉興縣人年五十遭父喪哀毀幾滅性嗣遭家難一月之內三兄繼沒妻白氏賀氏胥矢節家益窘若璉事嫂撫孤備極愛敬兄遺逋數百金皆拮据償之曰不以累孤寡也疾甚始以產均分諸子姪伯兄二子俱薨乃以已子所分瓦堂村地讓之同時劉祖乙王建極亦以讓資產與弟並爲縣人所欽

山西通志卷一百三十九 忠孝節
白金欽字儀臣興縣人兄弟五人怡怡無閒言執親喪哀毀
骨立乾隆丙辰以選拔赴

廷試擢上第引

見授州判不仕歸喜交遊善言論孫文定嘗比之孔北海王
景略一流佐文定幕以老子諱由翰林官至福建興泉永道
康基命字靖軒興縣人父卒家貧躬耕養母而令弟基田基
淵專力於讀妻延氏紡績佐之及兩弟學益進乃攜赴晉陽
書院肄業晝爲執炊夜爲警更卒成弟名

劉昌陽曲諸生少孤力田事母與妻連氏並得歡心服勞之
暇讀易爲娛又張永興張宗舜並以孝友爲鄉里所推

段河圖字玉書太原人力耕養母諸弟皆仰食焉母憐之令
析居力阻繼以涕泣母感其誠而止妻武氏屢失母歡出之

竟不復娶諸弟皆早卒撫其孤如子焉

武珍太原人傭工以奉母怡怡色養終身不衰母年九十餘乃終

高維績太原人少失恃父賈於外事繼母委曲承順三十餘年無間言母有女適人貧甚餽遺不絕諸甥皆子育之道光中汾河漲溢所居村屋宇淪陷惟其家無恙村人走投保全活至數十家焉

張貴之太原諸生生有至性兄某病扶持抑搔同宿牀者十年不少懈舅早卒孀孤無依體母意迎養之又縣人孫富文亦以孝友著

梁惠儀榆次農也與弟恕儀相友愛每食必俱弟病親煮湯藥晝夜不離嘗曰吾兄弟一生相依死安忍離及葬父並營

生壙祔焉太原某者其舊交將死謂其妻曰若衣食或不給
榆次梁惠儀吾友也往必有濟妻後攜子來榆惠儀淒然厚
遣之歸有成某贈以婢時僭弟出耕暮歸見之曰吾農家安
得蓄婢令爲義女擇壻嫁之其行義多類此

杜煥晦太谷人國子監典籍親喪廬墓

王永來太谷人家赤貧日乞鄰以奉母母病日夕侍側拭滌
穢濁扶持抑搔不稍懈母年踰八十卒竭情營葬哀感路人
然自是不復行乞矣嘉慶辛未歲歉親族哀其餓而饁之弗
受曰前之行乞爲養母也今已矣豈可以口腹累人未幾槁
死於祖塋旁里人勒石表其墓

顏翼祁縣人善養其親范秀岫事繼母無間言

閻茂字種之祁縣人道光壬午舉於鄉事母先意承志選潞

城訓導以母老乞歸母沒廬墓側三年同治初旌

桑廣旺祁縣人幼孤貧棄儒服賈以養其母母病思鮮食猝不及辦割股作羹以進並禱於神願以身代母沒哀痛幾絕聞者憐之同治初旌同時旌者又有戴璜梁佩珉並以孝友爲鄉里所推

馬寬字子厚祁縣人父賈於外爲逆旅所害寬力復其仇道光中歲歉乃出資築沙河隄以工代賑村無流亡而水患亦永息子化蛟辛巳舉人

王茂祁縣人貧不能娶傭功爲養已或糠覈不飽而奉母甘旨不缺母卒孺慕終身武運章亦祁人家貧力耕荒年鬻妻養母及弟鄉人憐之

渠光深祁縣人咸豐九年弟居不戒於火父仲華往救被焚

光深痛父及難亦以身殉

張有聲交城人服賈瀋陽聞父病啞卽辭歸奉養嘗語人曰出門獲萬金不如事親一刻也女弟二俱孀居無依遵母意養之終身同縣張三錫者亦買於遠方忽念母老六晝夜馳千餘里歸侍左右飲食必親者垂四十年

劉醜交城人以貌得名其祖經商墨爾根死焉父亦繼往醜既長事母維謹問父所在母泣告之醜欲往尋母以其癡且無貲故阻之醜憂疾至廢寢食一日別母去且行且乞年餘抵父所欲偕歸父不聽泣諫父終無歸志醜念母甚遂獨歸數年父竟客死聞訃仰天長號然母亦病未忍暫離也母且死謂醜曰兩世枯骨竟葬異域矣一慟而絕醜營葬畢復至墨爾根以囊盛祖與父骸負之而行衆感其孝醜以金不受

沿途乞食道經荒山遇虎幾如至家瘞骸先塋窮無所歸去之不知所終

閻桂高王振序閻秉性並忝城人克孝繼母張俊儒趙鴻瑞李躍鯤並有孝聲

王侯度文水巖貢弟侯慶早沒遺孤鍾文鍾健並幼侯度撫愛無間飲食教誨比於已子二十年無倦色後皆由科名起家歷官有聲

張釗張鉞文水人異母兄弟也雋於友恭至老不衰後鉞以病卒釗哭之慟數月亦卒釗子翼如亦有學行

賈爾及劉人聰並清源鄉人以孝旌入祠

王見龍興縣人武生居父母喪哀毀踰禮先後廬墓六年同

治中旌

以上太原府

王永命臨汾人生有至性父喪哀毀幾不起巡按劉請旌於朝尋舉順治戊子鄉試授遷安令多惠政內遷主事未任卒祀鄉賢遷安亦以名宦祀焉

徐昌時臨汾人順治乙酉副榜闖逆之變父衍祚被賊拷迫助餉以計脫父挺身代炮烙數十次濱死得免復勒就偽職力拒幾見殺終不受同縣高樹聲耆幼孤母狄氏素明大義教之成立賊以偽職招者三遵母教矢死弗從人咸稱之翟廷祐襄陵諸生闖逆之變繫其父索餉延祐號泣徧貸以輸脫父於難

李鼎生洪洞人順治己亥進士選庶常以家貧母老乞就校官後遷國子監助教

特賜帑金以獎其孝尋以病乞歸優游林下孝養不衰

張玉浮山人幼孤事母以孝聞順治六年土匪肆掠母驚懼成疾玉負母避地轉徙山谷間卒免於難母逝竭力營葬棄妻子廬墓三年巡按白爲之請旌建坊

張璜太平人童年喪父家赤貧鬻鹽以養其母己丑之變自運城冒大雪馳歸省母抵家襤履俱穿血殷踵不自知也兄玠諸生長璜三十歲事之惟謹母沒哀毀致疾尋卒

范起鳳岳陽人教授星隰子也順治庚午星鼎偶出遇行人乘馬佩刀結隊來者疑爲寇驚懼而竄至沁河岸將脫履以濟已復從他道逸去鳳迹之見履以爲父溺於水大哭泗水求父尸不得痛益甚不能復出遂死於水事聞得旌加制

袁雅度翼城人性至孝闖寇陷翼以其祖宗顯嘗爲天桂令執祖母薛氏責輸餉雅度請代寇怒以刀斫其臂血淋漓徧

體不肯去曰甯死不願見祖母受刑也薛獲釋寇縛雅度施
桁楊桁楊立壞復取復壞寇驚愕胥釋之

袁鏘珂翼城人爲諸生時寇至守父柩不去撫幼弟有恩義
弟嘗賦詩曰兄也視猶子父兮兼以師舉前明已卯鄉試貧
益甚或遺以百金謝弗受坐臥一室三十年邑人尊仰之
劉思聖翼城人父奇明天啟間蜀黔苗叛殞身殉難思聖年
十四恨父死節未揚赴關上陳獲蒙恩恤事母尤孝母病衣
不解帶五年沒復廬於墓旁與叔析產讓貲財累千金遇歲
大饑變產捐賑全活甚衆

孔毓全聖裔也祖恩用寓於翼遂占籍少時流寇蜂起奉親
避難途遇賊將刃之哀泣願以身代賊嘉其孝釋去母患癰
臥牀者六年嘗藥侍膳未嘗少怠弟亡撫姪如所生三世同

幾由歲貢任陵川訓導

成伯英鄉甯人遇閩賊追餉代父往賊憐之得釋後由功貢官至平涼府知府

文之龍鄉甯歲貢明末父避寇亂沒於荒原之龍崎嶇賊叢中竟得父骸歸葬

喬允極鄉甯人順治三年遭賊變執母奪金允極願以身代憐其孝而釋之

張國鑑臨汾人年十二父母繼亡廬墓三載後官乾州巡檢以禦寇賑荒著名

吳宏道臨汾人五世同居

李枻臨汾人生六月父沒維揚稍長力山養母旣而泣曰吾父羈魂千里不知暴露何所而猶儼然安居是罪人也請及

母健時往尋之抵揚蹤迹不得號泣街衢忽遇父執聶三者指引葬所匍匐負歸人以爲難鄉居睦族恤鄰

楊煌臨汾諸生事祖母及母以孝聞母患疽煌客於外聞之千里徒歸踵血淋漓弗覺也撫孤姪至成立待瞽妻有恩禮建義塾葬故友扶危拯急人咸高之

喬宏濟臨汾人事嫠母朱曲盡孝養母沒廬墓三年哀毀成疾卒又張州奇亦以廬墓稱孝

李樹奇臨汾拔貢母病籲天求代不如革者三年張峻字晉石歲貢生賈從淮太學生俱以侍疾顰身爲時所稱

王洽臨汾人父病延醫數百里外墜馬傷脊戒家人勿語恐傷親心侍湯藥不解帶者累月居喪哀毀特甚遇令節輒秋獻流涕悲不自勝己丑地震之變捐資檢遺骸之無主者備

棺瘞之范進士鄙鼎嘗表其墓

王達臣臨汾人家赤貧母病思肉割股作羹而進母食之愈里人白於官旌其門又孔傳孝村農也刲股愈父疾

王努臨汾貢生天性至孝父沒廬墓未終喪嘔血而亡

田樹楷臨汾人生時父經商在外久無耗稍長聞人談及父子輒流涕一日詳書其父姓字里居及出外之由徒步尋訪遍行秦隴歷三年不懈竟於肅州逆旅遇之卽奉以歸

黃旌略襄陵人癸卯拔貢家貧授徒自給事繼母崔氏盡孝養母患風痺背負出入歷久弗懈及沒哀毀骨立兄旌特從弟在中皆貧乏歲得脩脯必先分給鄉黨推重李宏蔭亦貢生事繼母及兄宏柱克盡孝誠人無間言又諸生楊樞撫從子之濟之禮無異已出

范爾梅字个臣洪洞歲貢生有至性總角時聞人講孝弟卽究問其義長從宗老進士彪西游有所授必身體之父沒哀毀幾殆事母尤摯母卒寢苦次三年不入室世父母菴疾子賈於外奉養惟謹兄弟無間言著五經隨筆四書札記諸書張書賢洪洞人父素患瘋癲扶持調護不傾刻離一日偶假寐父適外出覺而追尋無蹤倉皇間忽所畜犬來銜其衣若引路狀隨至一處父已顛踣道左急救乃甦負之歸其後母復病瘵每夕籲神求代母尋愈年至八十人以爲孝感云楊宏鉞洪洞人父九徵爲土豪所殺兄宏鎮訟不勝抑鬱死宏鉞年甫十二馳入都鳴諸登聞院得下所司申理豪復鬻產賣緣竟從未減宏鉞乃懷利刀欲伺其出而手刃之會謀洩事卒不濟憤極投井死

王昌祉洪洞人父家樟闖賊追餉繫焉昌祉請代受刑賊憐其孝並釋之

韓森洪洞諸生母喪哀毀幾滅性有孝友稱又例貢劉琬以孝友旌

李梗洪洞人父銘旂左脇患癰梗口吮膿血敷以藥遂瘥母郭素患心病醫藥罔效梗割股肉和藥進之沈疴頓起後以他病沒朝夕哀號粒米不入口者數日嘗於道旁拾遺金訪其人還之學使劉扁旌其廬

韓居展洪洞人父患噎醫窮於術日籲天祈代父疾進停餐展亦不食會有言股肉可愈者甫執刀爲家人所覺防範不得聞及父沒哀痛號泣淚盡成血知縣陳扁旌之又續國柱事其祖傳芳親爲採糞諸生燕子玉以醫事親並有孝稱

張其隆洪洞諸生少因兵亂於父母相失爲賊掠去其隆僞仆頭觸澗石血涔涔流賊呼之不應舍去旣歸訪知二親所在奔尋得之偕歸奉事益篤生養死葬靡不盡禮

楊端浮山諸生母患瘡甚危禱於神願以身代母尋愈與兄弟友愛同爨終身從無私蓄族子某將死以十歲兒相託爲之禦外侮持家計親課之讀得遊庠序嗣其家聲康熙辛丑荐饑節縮衣食捐粟佐賑當事皆匾獎之同縣張鏜周家鼎並以讓財推產著孝友聲

張敬冉太平人早喪父母竭力事兄兄病泄親爲滌穢共牀席者月餘及兄老時以妻子累弟爲歎令析箸敬冉流涕勸慰而兄持之愈堅乃以田產畀子姪平分俾各執業而於兄供養如常學使曹嘗旌之里人刊碑記其行

文心通太平諸生遭父喪哀毀逾禮遽至隕身妻楊氏亦以
完節聞

高梅太平人生甫晬父遽出未幾母亦死賴伯叔鞠之長年
十四詢知父客黃梅欲往尋之慮家人見阻遂不告而去越
二載竟奉父以歸其後子長閩商新疆十年不返梅年六旬
矣復跋涉萬里攜以歸

劉珥太平人議敘州判事親得歡心母沒值冬月朝夕哭奠
血淚成冰既葬哀痛成疾遂不起妻史氏將以身殉以救得
甦時人異之

張永年太平諸生父遊學遠出不知所之欲往訪苦無資乃
鬻產得數金其妻王氏質妝奩以助由晉入豫轉至楚北歷
三年始得父居穀城信往尋之則沒已八年矣乃扶柩歸傾

身營葬遠近嗟異

柴支榮太平諸生孝養繼母三十年加一日以叔母孀居弟幼將所析之產併與之人以爲難

楊立中太平監生明鄉賢天民裔孫也性純孝父病危時嘗冀辨其甜苦以卜病之愈否與弟友愛人無間言幼從舅氏李蔭槐學詩著有吟藁

毛澎太平廩生授徒鄰村距家十里以二親在堂早往暮歸二十年如一日父母相繼亡哭泣失明年五十卒鄉里哀之王老茄太平人所居傍西山煤峪距峪廿里許有涼泉老茄與父樵常飲之父病夜半思飲涼泉水老茄卽被衣往汲比歸天猶未明其地虎豹出入處也人喏曰駛哉何水不涼老茄曰不敢欺也

梁忠太平人與妻靳氏行傭以養母得錢悉供甘旨夫婦自
歷穰穰人皆憐其阨而自處恬如鄉里賢之

梁慎幾太平人官垣曲訓導與縣人趙燦並以善居喪稱廩
生劉繼宗監生盧錡劉琬李企調均事母能孝又董固張大
法鄭斐劉奇麟王明瑞皆以孝友著

趙相諸生韓瑾歲貢並岳陽人康熙中以孝行旌

許琳曲沃人曰強孫曰強遇害時琳年十二抱頸大哭加之
白刃不懼賊亦異之事繼母尤得歡心康熙辛酉舉鄉試第
一尋成進士由翰林改官知縣以親老告歸教授鄉里衛台
擢侍郎周允次子也以蔭候補行人司副母老終身不謁選
嘗築思園於澮水間奉母讀書其中著有思園詩藁

張燦曲沃諸生事繼母楊委曲盡孝母感其誠慈愛有加康

熙王寅歲荐饑出粟數百石計口授食全活甚多

張登庸曲沃人父茂功沒雲南計聞母以柩歸無期痛哭不欲生登庸泣謂母曰滇南不在天外母善自愛兒必有以報命負擔萬里備歷艱辛返父櫬

裴加厚曲沃人明鎮殿將軍良積子良積死於王事加厚時年十六奮身走萬里訪求父尸竟得歸葬與弟加增事母並孝友愛甚篤加厚子衡度律度加增子律度並以仕宦顯王者臣曲沃人事母以孝聞兄沒遠方數千里扶歸其櫬撫從子如其子焉

王高標曲沃人侯馬驛吏也事父極孝值歲饑每以炊爨次釜中熟則奉父所餘米汁和以黃齏糠粃與家人食之父弗知也嗔曰爾輩所食何以飯我及入口乃抱泣曰死則俱死

耳何忍獨飽精於瘍醫病者多賴以痊年九十而卒

蘇加誠曲沃人貧不能娶力傭以養母每與人約但飲食其母不復計直春秋佳日輒負母坐田間樹下饁者來持以奉母母欣然加餐有憐其孝者並予傭直不受固與之則僅受其半半蓋以當母飲食之資云

孫曰亨曲沃人父病嘗冀且籲天求代病尋愈母疾亦然比沒水漿不入口者五日歷數歲每一念及潸潸淚下

靳銘鉉曲沃人少喪母父其鳳染痼疾家亦貧偕妻劉氏鬻子養之歷八年如一日焉

王堯則曲沃諸生性恬淡好讀書居家以讓爲本六世同居閨門七十餘口時人比之張公藝同縣柴林柏者其家亦六世同居端謹好善人並稱之

張炳曲沃人家極貧父克容出走肅州二十餘年乏音耗炳
跋涉數千里越二載扶父歸業肩挑以養歲時酒肴必具父
素性嚴怒卽予杖炳立受不敢動父沒事母一如事父焉
李國選曲沃人家貧業針縫以養母母患噎國選露禱於神
割脇下肉調湯以進病旋愈

王定世曲沃人少孤家極貧事寡母楊菽水承歡克盡子職
中年失偶以子兼婦者四十餘年母年九十五而終竭力喪
葬鄉人賢之

郭桂思曲沃人生三月其父卽賈於遼東久無耗桂思長乃
貸資貿布往尋出關遍蹤之不得艱苦備嘗後訪得上官某
父故友也其妻爲指父柩得之荒寺中遂負骨歸

徐漸忠曲沃人親沒廬墓又武生韓憲武者民徐鈞皆以善

居喪聞其後廬墓者又有董存信及諸生蘇溶又諸生許之屏王曰義並以孝稱蘇白華溶子也與縣人劉閭疆楊鳳棲並事繼母有聲

楊效榮翼城諸生少年喪父奉母膳殊腆而身率妻子食糠覈母沒杖然後起既葬廬墓側三年所司建坊旌之范進士部鼎載入師善錄中

高威翼城諸生兄客死他鄉無子威間關千里力歸其喪有幼弟當父沒時方在襁褓愛不能割痛之甚威體父心鞠育備至生平究心理學博覽羣書從游甚眾又監生郭屏卽素貧歲祲貸得斗穀念弟方絕糧悉以畀之

劉宏績翼城副貢父罹凶禍冒險救援卒免於難母病禱天請以身代尋愈人稱其孝後官介休訓導子允祺領康熙辛

卯鄉薦又王曰欽諸生也事親以純孝聞

王振麟翼城人以父蔭入太學事親先意承志時稱純孝生母馮卒哀毀成疾遽以不起士論惜之又張孝榮成桂居喪並以毀卒

李遇陽翼城人母病臥十餘年未嘗少離夕必禮斗祈以身代值父省試母子煢煢一夜盜入見遇陽方嚮禱中庭盜遁去後以語人曰吾不忍驚孝子也父嘗患瘍親爲吮膿云崔吉人鄉甯歲貢母病親嘗湯藥不離跬步及沒閉戶三年人無見之者又成伯宗事父母承顏順志屢以孝行舉由貢官代州訓導

鄭周隆鄉甯諸生父沒於都扶柩歸號泣幾殞母病奉湯藥無傾刻離精於醫得針灸祕傳活人甚廣

劉漢宗鄉甯拔貢事繼母如所生盧錫彤廩生侍父疾不解帶者四十晝夜又縣人趙德巍吳通並以孝友著稱

王又旦鄉甯人由廩貢官至全州知州母卒哀毀骨立從弟再旦歲貢亦事母以孝聞

文在茲鄉甯人由歲貢官澈浦知縣幼喪父哀慕成疾奉母三十餘年備極色養賀松年亦歲貢學使按臨屢舉孝行張允懺臨汾人事親能先意承志父嘗爲一甲科所辱憤之督諸子讀甚嚴允懺力學以慰其心遂以乾隆丁酉舉於鄉及會試聞父病不終場而歸痛不及養哀毀骨立幾至滅性服闋成甲辰進士授祿豐知縣多政績

劉清襄陵人父善病醫藥罔效禱於神乞以身代一夕夢神語曰爾父病食虎肉可愈醒而異之念己生年在寅得勿可

當虎肉乎遂刲股烹以進疾果愈

周光裕襄陵農家子事親能伺意旨承色笑極田園之樂父
遭疾朝夕侍側跬步不離潔垢滌穢數年不懈

岳瀚字浩然洪洞人乾隆辛未進士除甯洋令以母老不欲
行母趣之乃就官未期年卽乞歸與弟湧同侍晨昏備極色
養後母沒弟亦繼逝哀痛迫切無復生意自是杜門不出終
身不與人事鄉里高其行湧字清泉以貢選訓導事母無傾
刻離中裙廁踰悉躬親滌滌居喪哀毀踰節嘔血數升絕於
苦次邑人士作詩歌以紀其孝

王鼎元字伯初洪洞人監生祖熙春官於閩父隨侍閱二年
祖沒於壽甯巡檢任道遠久無耗鼎元時方八歲朝夕悲泣
堅欲往尋之家人以其童穉且貧無資慰止之長服賈於齊

積十年度所贏資釐足給家乃屬弟善事母決計南行旣抵
壽甯詢知祖櫬所在而遍覓父竟無蹤有言在粵東者因附
商舶至粵一日過會城之大佛寺遇有操鄉音者詳詢之果
父也相與抱哭偕返壽甯發祖櫬扶以歸父晚年病喘母亦
多疾敬養無懈及居喪徒跣雞斯哀感行路一時文士多爲
詩歌紀其孝焉生平工繪事嘗寫齊魯勝蹟圖並著書畫紀
要藏於家

王鶴洪洞人鹽運司銜事親以孝聞嘗以事外出聞父病盲
急馳歸日夜祈禱父目復明鄉居多行義

喬德徵字升聞浮山人年十三遭父憂哀毀盡禮母疾禱於
神祈減已筭增母壽疾果愈人稱孝感力學爲諸生食餼雍
正中以品行端方膺保薦奉

命往廣東以州縣試用厯署封川始興仁化陽春從化諸縣所至胥有循聲會丁母憂抱病奔喪號泣不絕竟以致疾而卒著有律例圖鏡增訂洗冤錄藏於家

侯溥浮山人父緒業諸生中歲喪明溥年方十三扶持左右日夕嚮禱願以身代厯九年父目復明時稱孝感父沒毀瘠骨立既葬曰必詣墓痛哭積哀成疾未期而卒

齊昌浮山人事繼母無異所生母鍾愛之臨沒舉所積金盡以付昌昌不自私與兄均分焉鄉里稱其孝友同縣張鴻舉及監生韓國琦並以善事繼母著孝聲

喬東臬字澤三浮山人性慤直讀書養親不慕榮利素精於醫父健亭久病窮於術忽檢得一方需生人骨節立操刀割一指和藥以進病良已及父沒哀號痛不欲生曰侍栗主出

告反面無間晨昏鄉里咸稱爲眞孝子

王志仁太平人少不爲繼母所容析居於外訓蒙自給而所獲脩脯必以奉父父不受則易甘旨以進晚年父分給以產固辭父責曰爾居於孝而貽我不慈之名可乎乃受之喜讀性理書與絳人李子潛相善嘗以安貧樂道稱之曰樂道難言也身家謀拙欲不安貧得耶

李堂植太平舉人事祖母甚孝於二親克盡子職丁巳會試歸父歿已三日哀痛成疾積三年乃愈卒年七十有九鄉人爲樹碑紀其行

趙攸太平人早失怙恃事繼母梁氏饔飧澣濯悉躬親之母好施俱資無缺一日需銀甚殷倉猝莫措將之田拾得遺封發之適符所需數人稱孝感

程必弭曲沃諸生事繼母以孝聞奉兄尤謹由四庫館議敘
丞倅人稱通儒著有詩文集又許蒼佑敬兄甚至咸稱之
李一鐸翼城人事親能先意承志母沒鐸年已六十有五矣
猶爲孺子泣嚴冬洹寒廬於墓左又呂公輔侍疾居喪竭誠
盡禮官安陸府知事

李殿升翼城人親沒事之如生飲食必薦慘惻不能自止每
歲時掃墓哭聲振野聞者僉曰此八十翁哭父母也相詫爲
奇乾隆中督學蔡匾旌之命學官親致於其門焉

王占鼇汾西諸生援例授都昌縣丞少孤事繼母甚謹母生
三子教養兼盡皆有聲庠序持躬端謹不以服官稍易其節
邑士大夫皆矜式焉

楊維藩鄉甯廩生躬耕養親日或不再食而體父志未嘗廢

學撫弟妹及姪並竭心力乾隆初以孝行旌

鄭振聲鄉甯人解州訓導五歲喪父母矢節撫之奉養惟謹母性嚴間不懌卽憂戚無措長跪竟日俟色解始起邑人以孝行上旌如例

閻祝鄉甯諸生父病日侍牀褥間親拭汗穢不少倦事繼母尤得歡心乾隆中旌

成緒遠鄉甯人侍父疾十三年未嘗旁宿王舒增生母病侍側三年不懈王璣芳童年喪父孺慕終身又諸生盧之蒲張應乾並以善事繼母爲縣人所稱

李國宗臨汾人父以貿易沒京師喪不得歸國宗素口吃跛一足復殘右臂行必以杖徒步詣都門負父骨日蹣跚數十里途次安肅阻雨屋傾主人意其必死掘瓦礫視之猶負骨

蹲屋角無恙也一時嘖嘖稱孝感云

王濬臨汾歲貢事繼母曲意求歡母溺愛幼子子負博錢輒責濬償一日觸母怒杖擊濬額積腫成疣濬孝敬益加絕不介意母病侍湯藥進櫛滌溺皆身任之母卒後每撫其額輒流涕曰今欲母杖猶可得乎

齊奎炳臨汾人隨父賈豫值滑縣教匪之亂父病不能行奎炳負之而逃遇賊削鬣哀告賊感其孝竟釋之

李可成臨汾人與弟可名絕友愛家小康飲食動作追隨弗離年俱九十餘終其身無一言之忤鄉鄰有鬪牆者咸以可成兄弟勸之論者以爲有姜氏風焉

景發才臨汾人父娶未踰年遠賈安息一去無耗發才生不識父稍長屢欲往訪母輒止之年既壯乃請於母誓以父歸

跋涉萬里比至安息父已病沒遂負骸而還又鄭天佑者父沒京師叔死新疆質屋得錢並歸其柩云

王呆娃臨汾人家赤貧行乞養母母病拘攣每出則負之得食必先進母嘗夜宿山亭同伴爲狼所噬而呆與母無恙後不知所終

盧玉旨臨汾人家貧傭工事母母卒結廬墓側朝出傭晚歸必祭之三年不懈里人敦勸歸

盧長春臨汾農家子有弟二皆繼母出父與弟誤殺人議長春抵罪卽慨應無難色獄成遣戍後遇赦歸嘗有友以金八百相寄謹藏之數年無耗後以遺其子封識宛然

郭清標臨汾附貢嘗遊江南縣聞母病道遠急切不能還歸悲泣晝夜遂至失明道光丁未歲饑賑粟百石人皆義之卒

年八十三

逆攀龍字雲衢臨汾人天性敦謹繼母遇之虐稍失意詬挾交至曲意承順無忤色母病竭誠侍養居喪盡哀由進士授知縣不就鄉居教授造就甚多

逆士英臨汾人與弟士奎事親得歡心兄弟友愛無間士奎子登朝歲饑傭書養母母沒以貧不能備禮哀毀卒人稱逆氏三孝子云

張思恭臨汾農也事母盡孝光緒三年大祲恭自度不能保妻子盡斥田產易粟別儲之以供其母全家饑斃母獲無恙張殿鼇臨汾貢生事父盡禮又廩生梁維樅孝於繼母監生劉珍善事其兄李登俊劉樞張達辛梁秉元並以孝聞

董修業洪洞監生事親先意承志曲得歡心父病延醫滿縣

夜行虎狼窟無少阻及居喪哀毀骨立廬墓三年每祭作孺
子泣事繼母陳無異所生居鄉尤多善舉卒後公舉建坊旌
表子得初諸生亦以孝旌

喬澄溶洪洞人少喪父服賈東齊聞母病徒步歸星夜墜深
溝卒無恙越七日抵家母聞其至喜病霍然後居喪哀毀泣
血遂至喪明越年餘復瘞人以爲孝感

商膺紹洪洞人家貧傭作奉母甘旨必具冬夜無重衾每寢
伺母熟睡以已衾覆母而自擁敝衣忍寒徹夜冬盡乃已鄰
里憐其貧勸以服賈曰棄母遠適雖致富不忍也久之益窮
不得已乃屬母於所親南遊業縫務數年略有儲蓄卽歸不
復出孝養終身

衛名揚洪洞人有至性八歲喪父絕粒者三日人皆奇之事

母曲意承歡母病疽口吮膿血割指和藥敷之卽愈後又病
胃醫藥無效禱諸神求以身代亦愈人以爲精誠所感

鄭凌雲洪洞武生父客豫久無耗凌雲奔尋未獲念母老邁
歸及母卒奮然曰今可以行吾志矣仍入豫遍履河洛歷六
七年無蹤復西行入關遇客僧言富平山寺遇一老翁已於
去歲卒矣審姓名籍貫悉符合遂奔赴山寺僧爲引至墓所
刺血滴骨不謬扶輿以歸與母合葬焉學使朱匾旌之

楊倫洪洞人咸豐中歲貢貧事母能以菽水承歡母卒哀毀
嘔血而亡又諸生申芷升居父喪以毀卒王漢父歿於外力
歸其喪侍母病憂勞成疾死

李延祚洪洞人幼育於繼母及長奉養備至後病墮恐貽母
憂力疾以承色笑疾亟惟囑妻善事母大呼母者三而卒

呂鑑洪洞人事親甚孝咸豐三年粵匪入境母方病父柩未葬固守不忍去賊至以白刃加頸鑑曰殺我自甘幸勿傷吾親也賊憐其孝舍之去

楊清浩洪洞諸生事親盡孝念母老非人不暖令妻王與母同臥席爲常母年九十始卒哀泣如孺子同治六年捻匪擾境夫婦抱木主避亂墓側賊見木主外無長物曰此孝子也相戒勿犯

許受晉洪洞廩生授徒養親母好施每有所需必拮据措置以博歡心光緒丁丑大祲貧窘不能具甘旨時悲泣母慰之母沒哀毀成疾未幾亦卒

劉納洪洞附貢少孤從兄受學事之如父諸姪謀析產禁之不可乃擇膏腴田盡付之又諸生王浴劉毓奇並善事兄爲

鄉里所欽

陳世選洪洞諸生與恩貢張榮甲陳麟呈從九龐思聰賀聯芳並旌表孝行又朔平府教授劉旣裕諸生喬殿元並以廬墓稱孝旌如例

秦秉直浮山諸生父客於潁歲必往省及卒喪葬盡禮性廉介絕俗嘉慶丁卯於道拾遺金數百訪知爲周氏售產之資攜還其家鄉里咸推重焉援例以州同注選未仕卒

張午陽浮山人幼孤繼母鞠之長事之如所生母亦忘其非已出也服賈天津用鹽莢起家入資爲縣丞在津門倡立救生會凡舍棉衣設粥廠施棺木諸義舉歲恆爲之而必將以母命當道賢之

郭炳然太平人父琳商遊西甯病沒炳然時在襁褓櫬久不

歸旣長徒行出塞而父同事皆謝世無從詢厝棺所哀願遍訪人乃得之扶以歸葬祭如禮道光三年以孝旌

楊站太平諸生繼母張性嚴厲站曲意承歡母卒感悅又諸生毛璋亦以孝事繼母稱

李聚善太平人七歲時出嗣從父兩房析居已數十年矣聚善敦崇孝友積誠相感復同爨焉子姪輩亦恪遵其訓無纖芥嫌又王克和者兄弟異居獨力奉母後羣從皆感其孝合炊如初嘗拾遺金訪還之

李大兒太平人家赤貧又有廢疾乞食以養繼母鄰里憐其孝每多與之大兒得佳餌輒以遺母母所生子素無賴時時勸誨繼以涕泣聞者嗟異

劉允讓岳陽諸生父沒廬墓左世煥以貢署甯武訓導亦善

居喪又監生張履中張福康侍親疾並稱誠孝

孫保元岳陽貢生事母克盡色養出粟賑饑趙懷瑾鄉農也
不知書而事父視膳問寢動合於禮人呼莊家孝子

張詡曲沃人附貢全宦子也議敘監知事成豐癸丑粵逆掠
及其村父爲賊劫詡泣求代賊竟殺父詡痛罵亦被殺

馬孔昭曲沃人善事繼母丁戌大饑鬻什物得食母輒分給
子女乃潛儲其半於鄰舍令母所善媼邀偕往因別食而自
屑糠粃與家人共之卒以餒死母竟無恙

高榮陞曲沃武生父沒柴毀幾致滅性旣葬廬墓三年又廩
生上官薪傳事母有老萊風舉人仇恩銓與兄恩榮友愛備
至適魁祿賈人也亦善事兄

王道成翼城諸生事母得歡心供書內閣冀得祿養適假歸

見母衰羸遂侍養不復出母性好施委曲將順至耗資產未嘗有後言也又諸生李光裕及縣人王展喆衛王翊並以孝友爲一時所欽

高若泰翼城人事祖父母色養備至偶不豫輒徬徨廢食祖適年九十四始卒祖母董亦至大菴生平喜施給歲饑罄資助賑鄉里多賴之

王茂西汾西人幼有至性母患瘍親爲吮膿父官靖邊尉告歸路經黃河岸馬蹶身隕茂西攀杆直下力持父竟無恙觀者詫爲精誠所感有幼弟素揮霍衣物悉任取攜或問之笑不答孝友之稱內外無間道光中旌

吳學泰汾西人少隨父外貿順志承歡父病親滌污穢朝夕焚祝祈以身代與兄學達並爲同里所欽學達少時嘗爲母

吮疽云同治中皆以孝子公舉

楊陶字柳西鄉甯歲貢善事繼母母王性嚴厲陶委曲求悅其心年逾六十猶每食必侍出告反而依依然有孺子色時以爲難子恩樹由舉人官潞安府教授父沒時弟寶樹生甫六月飲食教誨情誼懇摯縣人言孝友者恒舉其家爲式焉趙德勝鄉甯人少孤事母盡孝母患足癰家貧不能延醫親吮百餘日乃痊及母老又病痿臥牀年餘幹穢滌溺略無懈容

以上平陽府

右太原平陽二府二百七十八人

又九十五人附見

段時盛絳州人母病噎徧求醫藥或云股肉可療乃割股和麪以進母尋愈又陶天長者亦嘗割股療親疾

梁從高絳州諸生嫡母患咯血醫窮於術乃與兄應高各割

臂肉和藥奉母疾遂已

侯佐字東俾解州人崇禎間進士宰建平合肥有能聲擢刑曹轉吏曹以公恕聞在籍遭亂急父難死之

山西通志卷一百三十九